



**KARATE SAVEZ FEDERACIJE BOSNE I
HERCEGOVINE**

S T A T U T
KARATE SAVEZA FEDERACIJE BOSNE I HERCEGOVINE

Tuzla, 02.12.2017. godine



Na osnovu člana 12. i 14. Zakona o udruženjima i fondacijama Federacije Bosne i Hercegovine ("Službene Novine FBiH" broj: 45/02), a u skladu sa članom 39. Statuta Karate saveza Federacije Bosne i Hercegovine na sjednici Skupštine Karate saveza Federacije Bosne i Hercegovine održanoj 02.12.2017.godine, u Tuzli u s v o j e n j e:

STATUT KARATE SAVEZA FEDERACIJE BOSNE I HERCEGOVINE

I OPŠTE ODREDBE

Član 1.

Karate Savez Federacije Bosne i Hercegovine, (u daljem tekstu: Savez) je nevladina, nepolitička, neprofitabilna organizacija i ne dozvoljava diskriminaciju, u kojeg su ravnopravno udruženi karate klubovi sa područja Federacije Bosne i Hercegovine. Savez je nezavisno strukovno sportsko udruženje koje je osnovano radi unaprjeđenja i razvoja karate sporta.

Član 2.

Statut Karate saveza Federacije Bosne i Hercegovine (u daljem tekstu: Statut) sadrži:

1. Naziv Saveza, skraćeni naziv Saveza i adresu Saveza;
2. Ciljeve i djelatnost Saveza;
3. Zastupanje i predstavljanje Saveza,
4. Organe Saveza, njihove ovlasti, način imenovanja i opoziva, trajanje mandata, kvorum i pravila glasanja, uključujući i pitanja o kojima se odlučuje kvalificiranom većinom, funkciju lica ovlaštenog da saziva Skupštinu,
5. Oblik i sadržaj pečata Saveza,
6. Oblik i sadržaj znaka ukoliko Savez donese odluku o istom,
7. Sticanje i raspolaganje imovinom Saveza;
8. Način donošenja finansijskog izvještaja i izvještaja o radu;
9. Postupak za donošenje Statuta, izmjena i dopuna Statuta i drugih općih akata Saveza;
10. Uvjete i način učlanjenja, prestanak članstva kao i prava, dužnosti i odgovornost članova Saveza;
11. Uslove i postupak za pripajanje, razdvajanje, transformaciju ili prestanak rada Saveza;
12. Pravila za raspodjelu preostale imovine u slučaju prestanka rada Saveza.

Član 3.

Osnovni principi rada Saveza su:

1. zakonitost,
2. dobrovoljnost,
3. ravnopravnost,
4. otvorenost,
5. transparentnost.

Član 4.

Puni naziv Saveza je:
Karate savez Federacije Bosne i Hercegovine
Skraćeni naziv Saveza je:
KS FBiH
Sjedište Saveza je u Sarajevu u ulici Alipašina br.14 L.

Član 5.

Savez je pravno lice upisano u registar udruženja Ministarstva pravde Federacije Bosne i Hercegovine sa pravima i obavezama utvrđenim zakonom i ovim Statutom.
Savez ima svoj žiro račun kod poslovne banke.
Za preuzete obaveze Savez odgovara svom svojom imovinom i sredstvima.

II CILJEVI I DJELATNOST SAVEZA

Član 6.

Ciljevi Saveza su:

1. Razvijanje svijesti građana, posebno mladih o karate sportu i njegovim vrijednostima i stvaranja potrebe bavljenja istim;
2. Uključivanje mladih, posebno školske omladine u karate sport i davanje doprinosa u vaspitanju, obrazovanju i psihofizičkom razvoju djece i omladine koja se bave karate sportom radi stvaranja stabilnih društveno korisnih osoba koje će doprinostiti izgradnji međusobnog povjerenja i saradnje u društvenoj zajednici u kojoj žive i djeluju;
3. Podsticanje i afirmisanje karate sporta i njegovih vrijednosti kao jednog od sportskih segmenata i kulturnih vrijednosti društva;
4. Očuvanje zdravlja građana koji se rekreativno bave karate sportom kao i djece i omladine koja se organizovano bave karate sportom, kao osnov svake ljudske aktivnosti, radne produktivnosti, izražavanje stvaralaštva i humanog življenja;
5. Podsticanje sistematskog i organizovanog bavljenja karate sportom u slobodno vrijeme i njegov dalji razvoj i afirmacija u Federaciji Bosne i Hercegovine;
6. Prezentacija vrhunskog sportskog – karate stvaralaštva na svim nivoima;
7. Sistemsko stvaranje uslova za organizovanim bavljanjem karate sportom kao preduslov za postizanje vrhunskih sportskih rezultata;
8. Afirmacija i popularizacija karate sporta i postizanje vrhunskih sportskih rezultata kroz sportska takmičenja i priredbe (manifestacije, susrete, smotre, igre);
9. Organizacija sistema takmičenja u skladu sa pravilima Karate saveza Bosne i Hercegovine.

Član 7.

Utvrđene ciljeve Savez izvršava kroz sljedeću djelatnost:

1. Utvrđivanje programa razvoja karate sporta u skladu sa Strategijama razvoja sporta u kantonima i Federaciji Bosne i Hercegovine.
2. Utvrđivanje sistema i uslova karate takmičenja u skladu sa sistemom takmičenja u Karate Savezu Bosne i Hercegovine i organizovanje i provođenje karate takmičenja u Federaciji Bosne i Hercegovine.



3. Zastupanje i predstavljanje karate sporta Federacije BiH unutar BiH.
4. Pripremanje i nastupanje takmičara na kantonalnim, federalnim i državnim prvenstvima.
5. Realizacija sistema polaganja za karate zvanja.
6. Vođenje jedinstvenog registra karate klubova udruženih u Savez i uvođenje jedinstvenog registra kantonalnih i federalnih sudija, trenera, ljekara, delegata takmičenja i sl.
7. Uspostavljanje odgovarajućeg sistema zdravstvenog nadzora u karate sportu i saradnja sa Zdravstveno ljekarskom komisijom Karate saveza Bosne i Hercegovine.
8. Planiranje i praćenje školovanja i usavršavanja karate sportista, trenera, sudija i sportskih radnika.
9. Organizovanje seminara, okruglih stolova, debata i drugih oblika edukacije kao dodatni oblik usavršavanja.
10. Saradnja sa istim ili sličnim udruženjima, asocijacijama i drugim organima i organizacijama u zemlji.
11. Izdavanje biltena i brošura u cilju edukacije i informisanja članstva Saveza.

III ZASTUPANJE I PREDSTAVLJANJE SAVEZA

Član 8.

Savez u pravnom prometu sa trećim licima i pred javnošću zastupaju i predstavljaju, Predsjednik Upravnog odbora ili lice koje on ovlasti.

Član 9.

Organi Saveza su:

1. Skupština,
2. Upravni odbor,
3. Predsjednik Upravnog odbora,
4. Potpredsjednik Upravnog odbora
5. Nadzorni odbor Saveza

1. Skupština

Član 10.

Skupština je najviši organ upravljanja i odlučivanja u Savezu.

Skupština može zasjedati kao redovna i vanredna.

Redovna skupština se zakazuje najmanje jednom godišnje, a vanredna po ukazanoj potrebi.

Skupštinu saziva i predsjedava predsjednik Skupštine a u njegovom odsustvu potpredsjednik Skupštine na prijedlog 4/5 Upravnog odbora, najkasnije 15 (petnaest) dana prije njenog zasjedanja.

Član 11.

Sve članice Saveza (registrovani klubovi), imaju po jednog predstavnika u Skupštini Saveza.

Na Skupštini klub može predstavljati samo jedan, pismeno ovlaštenu predstavnik. Isto lice može zastupati samo jednog člana Skupštine Saveza.

Klubovi iz Brčko Distrikta mogu biti članovi Karate saveza Federacije Bosne i Hercegovine.

Član 12.

Skupština Seveza donosi i usvaja:

1. Donosi Statut, izmjene i dopune Statuta i druge akte određene Statutom,
2. Daje saglasnost na pravne radnje poduzete u postupku osnivanja Saveza,
3. Bira i opoziva predsjednika i potpredsjednika Skupštine, Predsjednika i Podpredsjednika Upravnog odbora i Nadzorni odbor, članove Upravnog odbora, ukoliko Statutom upravni odbor nije predviđen kao poseban organ, imenuje i opoziva lice ovlašteno za zastupanje Saveza,
4. Usvaja izvještaje koje je pripremio upravni odbor ili lice ovlašteno za zastupanje i predstavljanje,
5. Odlučuje o udruživanju u saveze, pripajanju, razdvajanju, transformaciji, prestanku rada i drugim statusnim promjenama Saveza,
6. Bira delegate i predstavnike u organe i tijela Karate saveza Bosne i Hercegovine,
7. Delegira 42 delegata Karate saveza Federacije Bosne i Hercegovine za Skupštinu Karate saveza Bosne i Hercegovine.
8. Izabrani delegati iz Karate saveza Federacije Bosne i Hercegovine predlažu 9 (devet) članova u Upravni odbor Karate saveza Bosne i Hercegovine uključujući i 2 (dva) člana Predsjedništva koji ne mogu biti iz istog konstitutivnog naroda.
9. Odlučuje o svim pitanjima koja nisu u nadležnosti drugog organa.

Član 13.

U vanrednim okolnostima zbog nemogućnosti održavanja sjednice Skupštine, sve ingerencije preuzima Upravni odbor, uz obavezu da sazove sjednicu Skupštine najkasnije 60 dana od momenta otklanjanja uzroka zbog kojih se sjednica nije mogla održati, te Skupštini predočava sve donesene odluke na potvrdu.

Član 14.

Zahtjev za održavanje vanredne sjednice Skupštine može podnijeti najmanje 4/5 članova Skupštine uključujući 4/5 konstitutivnih naroda.

Vanredna Skupština može biti sazvana na inicijativu predsjednika ili potpredsjednika Skupštine uz saglasnost 4/5 Upravnog odbora kada oni smatraju da je to neophodno i na pismeni zahtjev 4/5 članova Upravnog odbora Saveza, koja uključuje 4/5 predstavnika konstitutivnih naroda.

Vanrednu sjednicu Skupštine saziva predsjednik Skupštine.

U slučaju da zbog odsutnosti, spriječenosti ili iz drugih razloga predsjednik Skupštine ne može ili ne želi sazvati vanrednu sjednicu, tu sjednicu saziva potpredsjednik Skupštine.

U slučaju da se takav zahtjev pojavi Skupština mora biti održana u roku od 30. dana od dana prijema zahtjeva, koji mora biti pismeno obrazložen.

Vanredna Skupština može odlučivati samo o pitanjima zbog kojih je sazvana, a odluke imaju istu važnost kao i odluke redovne Skupštine.



Član 15.

Članovi Skupštine se obavještavaju o dnevnom redu najmanje 30 dana prije njenog održavanja.

Sjednicom Skupštine rukovodi predsjednik Skupštine, a u slučaju njegove spriječenosti podpredsjednik.

Predsjednik, podpredsjednik i članovi Upravnog odbora nemaju pravo glasa kada se na Skupštini odlučuje o izvještajima organa čiji su članovi.

Član 16.

Svake četvrte godine sjednica Skupštine je izborna.

Skupština ima Predsjednika i Podpredsjednika

Predsjednik i Podpredsjednik Skupštine ne mogu biti birani iz reda istog konstitutivnog naroda.

Predsjednik i Podpredsjednik Skupštine se rotiraju na funkciji svakih godinu dana.

Mandat članova Skupštine traje 4 (četiri) godine.

Član 17.

Skupština radi i odlučuje u skladu sa ovim Statutom i Poslovníkom o radu Skupštine Saveza.

Kvorum se utvrđuje prije početka rada Skupštine.

Skupština punovažno odlučuje samo ako je prisutna natpolovična većina od ukupnog broja punopravnih članova Skupštine uključujući nadpolovičnu većinu konstitutivnih naroda.

Skupština može odlučivati po drugom pozivu, nakon jednog sata ako je prisutna najmanje jedna trećina članova Skupštine uključujući natpolovičnu većinu konstitutivnih naroda.

Odluke se donose nadpolovičnom većinom prisutnih uključujući većinu konstitutivnih naroda.

Sljedeće odluke su izuzetak od pravila iz stava 2 i 3. ovog člana i bit će donesene ako se za njih izjasni 4/5 (četiri petine) ukupnog broja članova Skupštine, uključujući 4/5 (četiri petine) konstitutivnih naroda.

1. svi izbori;
2. promjene sjedišta Saveza;
3. promjena ovog Statuta;
4. isključenje člana Saveza;
5. prestanak rada Saveza



2: Upravni odbor

Član 18.

Upravni odbor ima Predsjednika i Potpredsjednika.

Predsjednik i Potpredsjednik Upravnog odbora ne mogu biti birani iz reda istog konstitutivnog naroda.

Upravni odbor ima najmanje 9 (devet) a najviše 15 (petnaest) članova, vodeći računa da ukupan broj članova Upravnog odbora zajedno sa Predsjednikom i Potpredsjednikom mora biti neparan.

Odluku o broju članova Upravnog odbora donosi Skupština saveza.

Članovi Upravnog odbora mogu biti opozvani i prije isteka mandata na koji su izabrani i to:

1. na sopstveni zahtjev;
2. ako ne prisustvuju sjednicama tri puta uzastopno bez opravdanih razloga;
3. ako svojim radnjama u vezi sa radom Upravnog odbora ruše ugled Saveza;
4. u drugim slučajevima predviđenim Zakonom, ovim Statutom i aktima Saveza.

O opozivu člana Upravnog odbora odlučuje Upravni odbor sa 4/5 četiri petine glasova od prisutnog broja članova Upravnog odbora uključujući 4/5 (četiri petine) konstitutivnih naroda.

Član 19.

Upravni odbor je izvršni organ Skupštine i njoj odgovara za svoj rad.

Članovi Upravnog odbora se biraju iz reda istaknutih sportista, sportskih, javnih i društvenih radnika i uspješnih menadžera.

Prilikom izbora članova Upravnog odbora vodit će se računa o ravnopravnoj, teritorijalnoj, nacionalnoj i rodnoj zastupljenosti.

Prilikom izbora članova u Upravni odbor vodit će se računa o ravnopravnoj zastupljenosti konstitutivnih naroda.

Član 20.

Upravni odbor nadležan je da:

1. Priprema sjednicu Skupštine Saveza;
2. Priprema i predlaže nacrt Statuta i drugih akata koje donosi Skupština;
3. Provodi politiku, zaključke i druge odluke koje je donijela Skupština;
4. Upravlja imovinom Saveza,
5. Podnosi godišnje i periodične izvještaje o svom radu Skupštini na usvajanje,
6. Donosi opšta akta kojima se detaljnije reguliše rad pojedinih komisija odnosno segmenata rada Saveza;
7. Imenuje komesare komisija Saveza,
8. Imenuje selektore reprezentacija;



9. Imenuje Sekretara Saveza na profesionalnom radnom odnosu
10. Bira i opoziva sportskog direktora Saveza,
11. Usvaja:
 - a. Pravilnike komisija
 - b. Poslovnike o radu Upravnog odbora i komisija,
12. Obavlja i druge poslove određene ovim Statutom.
13. Za pomoć u radu Upravni odbor imenuje, stručni savjet, odbore, komisije ili pojedince.

Član 21.

Upravni odbor radi u sjednicama i u skladu sa Poslovníkom o radu Upravnog odbora. Sjednice Upravnog odbora saziva Predsjednik uz konsultaciju sa Potpredsjednikom Upravnog odbora. Sjednice Upravnog odbora održavaju se po potrebi, a najmanje jednom u dva mjeseca. Upravni odbor može punovažno odlučivati ako sjednici prisustvuje 4/5 (četiri petine) članova Upravnog odbora.

Upravni odbor odluke donosi koncenzusom.

U slučaju ako koncenzus nije moguće postići onda se odluka usvaja četiri 4/5 (četiri petine) glasova od prisutnih broja članova Upravnog odbora, uključujući i 4/5 (četiri petine) glasova konstitutivnih naroda.

3. Predsjednik Upravnog odbora

Član 22.

Predsjednik uz konsultaciju sa Potpredsjednikom priprema sjednice Upravnog odbora. Predsjednik je ovlašten i dužan da u hitnim slučajevima, kada nije moguće brzo i efikasno organizovati sjednice Upravnog odbora, iste može organizovati telefonski odnosno elektronski, uz obavezu da se predmetna odluka iznese i stavi na verifikaciju Upravnog odbora na prvoj narednoj sjednici.

Član 23.

Mandat predsjednika, potpredsjednika i članova Upravnog odbora traje 4. (četiri) godine sa pravom ponovnog izbora.

Predsjednik i Potpredsjednik rotiraju se na svojim pozicijama svakih 12 mjeseci.

Član 24.

Predsjednik predsjedava sjednicama Upravnog odbora.



4. Potpredsjednik Upravnog odbora

Član 25.

Potpredsjednik pomaže predsjedniku u radu i zamjenjuje ga u njegovom odsustvu.

5. Nadzorni odbor Saveza

Član 26.

Nadzorni odbor Saveza kontrolira finansijsko poslovanje Saveza i o uočenim nepravilnostima bez odlaganja izvještava Skupštinu i Upravni odbor Saveza.

Nadzorni odbor dužan je upozoriti na nepravilan rad organa Saveza, na propuste u primjeni odredaba Statuta, te na nezakonito i nenamjensko trošenje sredstava Saveza.

Nadzorni odbor dužan je prema potrebi, a najmanje jednom godišnje, pregledati finansijsko – materijalno poslovanje Saveza.

O svom radu Nadzorni odbor izvještava Upravni odbor i Skupštinu Saveza.

Svi organi Saveza dužni su Nadzornom odboru dostaviti tražene podatke, omogućiti uvid u dokumentaciju i druge podatke koje zatraži, te ga izvjestiti o tome što su učinili u vezi sa njegovim nalazima i prijedlozima.

Član 27.

Skupština Saveza bira Nadzorni odbor na prijedlog članova Saveza.

Nadzorni odbor od 3 (tri) člana, čine: Predsjednik, Podpredsjednik i 1 (jedan) član.

Funkcije Predsjednika i Podpredsjednika ne mogu biti popunjene iz istog reda konstitutivnog naroda.

Predsjednik, Podpredsjednik i član Nadzornog odbora ne mogu biti članovi organa i radnih tijela Saveza, niti mogu vršiti bilo koju drugu funkciju u Savezu.

Mandat članova Nadzornog odbora traje četiri godine, uz mogućnost produženja mandata.

Mandat Predsjednika i potpredsjednika Nadzornog odbora se rotira nakon isteka 1 (jedne) godine, nakon čega se navedena funkcija popunjava naizmjenično.

Nadzorni odbor može punovažno odlučivati ako su prisutni svi članovi.

Stavove, mišljenja i prijedloge Nadzorni odbor utvrđuje konsenzusom.

O svojim zaključcima, stavovima i mišljenjima Nadzorni odbor izvještava Skupštinu saveza.

Nadzorni odbor može, u okviru svoje nadležnosti, pokrenuti postupak kod Disciplinske komisije.

Sjednice Nadzornog odbora saziva Predsjednik Nadzornog odbora uz konsultaciju sa Potpredsjednikom ili na zahtjev Predsjednika i Potpredsjednika Upravnog odbora Saveza.

Nadzorni odbor donosi Poslovnik o svome radu.

5. Sekretar

Član 28.

Sekretara Saveza bira Upravni odbor Saveza.

Sekretar je stručno lice osposobljeno za rad u karate sportu na profesionalnom radu u Savezu.

Sekretar je samostalan u svom radu.

Za sekretara Saveza može biti izabrano lice:

1. Sa visokom školskom spremom
2. Koji je afirmisani sportski radnik u karate sportu, poznavalac organizacije Saveza u svim segmentima rada.

Sekretar saveza obavlja sljedeće poslove :

- Zadužen je za rad stručne službe Saveza,
- Zadužen je za odnose sa članicama Saveza i asocijacijama u koje je Savez učlanjen, kao i za odnose sa trećim licima.
- Pomaže u pripremi sjednica Upravnog odbora Saveza i sjednica Skupštine Saveza.
- Realizuje odluke Upravnog odbora Saveza i vodi brigu o sredstvima i njihovom racionalnom i zakonskom korištenju.
- Predstavlja Savez u komunikaciji sa pravnim licima i u odnosima sa javnošću.
- Obavještava javnost i sredstva informisanja o radu Saveza.
- Sekretar je zadužen za koordinaciju rada komesara komisija Upravnog odbora.
- Učestvuje u pripremi prijedloga normativnih akata, odluka i drugih materijala za sjednice Skupštine i Upravnog odbora.
- Nalogodavac je za izvršenje odluka Saveza koje se odnose na finansijsko materijalno poslovanje po ovlaštenju Upravnog odbora,
- Odgovara za zakonitost u radu Saveza,
- Vršiti i druge poslove i zadatke po ovlaštenju Upravnog odbora,

Za rad u Savezu Sekretar će primati nadoknadu ili platu što će biti regulisano odlukom o zasnivanju radnog odnosa ili ugovorom o djelu.

Za obavljanje stručnih, administrativnih i pomoćnih poslova, Savez može imati stručnu službu.

Organizacija i rad stručne službe uređuje se Pravilnikom.

Poslovima stručne službe rukovodi Sekretar Saveza.

Sekretar je obavezan da prisustvuje sjednicama Skupštine i sjednicama Upravnog odbora bez prava glasa.

Za svoj rad odgovoran je Upravnom odboru karate Saveza.

Stalne komisije Upravnog odbora su:



V KOMISIJE SAVEZA

Član 29.

1. Tehnička komisija,
2. Trenerska komisija
3. Komisija za zvanja,
4. Sudijska komisija,
5. Komisija za takmičenja, sigurnost i tehnička pitanja
6. Disciplinska komisija,
7. Zdravstvena i antidoping komisija
8. Selektorska komisija
9. Statutarno pravna komisija

U zavisnosti od potrebe Upravni odbor može imenovati komesare za obavljanje poslova i pomoć u radu Upravnog odbora.

Sastav, mandat i djelokrug rada komisija utvrdiće se posebnim pravilnicima za svaku komisiju ponaosob koji moraju biti usklađeni sa Statutom i pravilnicima Karate saveza Federacije Bosne i Hercegovine.

VI SPORTSKI DIREKTOR

Član 30.

Sportskog direktora bira i razriješava Upravni odbor.

Direktor se bira iz redova istaknutih sportskih stručnjaka.

Direktor se bira na period od 4 (četiri) godine, i može biti ponovno biran na istu funkciju.

Direktor za svoj rad odgovara Upravnom odboru.

Sportski direktor ima slijedeće nadležnosti:

1. Organizuje i prati sprovođenje takmičenja iz takmičarskog kalendara koji je usvojio Upravni odbor,
2. Prati realizaciju plana i programa rada reprezentativnih selekcija za međunarodna takmičenja,
3. Realizuje organizaciju kampa za mlađe i perspektivne sportiste,
4. Obavlja poslove koje mu u nadležnost prenese Upravni odbor.
5. Sportski direktor je za svoj rad odgovoran Upravnom odboru.

VII OBLIK I SADRŽAJ PEČATA SAVEZA

Član 31.

Savez ima svoj pečat, štambilj, zastavu i znak.

Pečat je okruglog oblika prečnika 30 mm sa tekstom ispisanim po obodu koji sadrži puni naziv i sjedište Saveza (Karate savez Federacije Bosne i Hercegovine), u sredini pečata je znak Saveza.

Štambilj je pravougaonog oblika dimenzija 50 x 30 mm sa tekstom: Karate savez Federacije Bosne i Hercegovine _____, Broj: _____ / _____, Datum, _____ / _____.

Za korištenje i čuvanje pečata, štambilja, zastave i znaka Saveza odgovorni su Predsjednik i Sekretar Saveza.

VIII OBLIK I SADRŽAJ ZNAKA SAVEZA

Član 32.

Znak i zastavu Saveza utvrđuje Skupština saveza svojom odlukom na prijedlog Upravnog odbora Saveza uz prethodno provedenu proceduru raspisivanja konkursa i odabira znaka i zastave.

IX STICANJE I RASPOLAGANJE IMOVINOM

Član 33.

Upravljanje imovinom vrši se sa pažnjom i na odgovoran i zakonit način u najboljem interesu Saveza.

X NAČIN DONOŠENJA FINANSIJSKOG IZVJEŠTAJA I IZVJEŠTAJA O RADU

Član 34.

Savez vodi finansijske knjige i sastavlja finansijske izvještaje u skladu sa važećim zakonskim propisima.

Član 35.

Savez donosi godišnji finansijski plan i plan prikupljanja sredstava potrebnih za rad Saveza i ostvarivanja statutarne ciljeve.

Savez donosi godišnji plan rada i aktivnosti a može donijeti i dugoročni strateški plan rada i razvoja za period od najmanje 4 godine.
Skupština Saveza najmanje jednom godišnje razmatra: Izvještaj o radu Saveza i Finansijski izvještaj.

Planove i izvještaje iz stavova 1; 2; i 3 ovoga člana Statuta priprema i predlaže Upravni odbor, a usvaja ih Skupština Saveza.

Član 36.

Za ostvarivanje svog programa rada Savez se finansira iz slijedećih izvora finansiranja:

1. Članarine,
2. Ispitnih taksi za zvanja i licence,
3. Organizacije takmičenja na domaćoj i međunarodnoj sceni,
4. Ljetni i zimski kampovi,
5. Distribucija sportske opreme i rekvizita,
6. Dobrovoljni prilozi i pokloni fizičkih i pravnih lica,
7. Sredstva dodijeljena iz budžeta,
8. Prihodi od kamata, dividendi, dobiti od kapitala, zakupnina, honorara i sličnih izvora pasivnih prihoda,
9. Prihodi stečeni obavljanjem privredne djelatnosti
10. Donatorstva i spozorstva i
11. Drugi prihodi stečeni u skladu sa zakonom i Statutom.



Član 37.

Savez može obavljati neposredne privredne djelatnosti (privredne djelatnosti koje nisu neposredno povezane s ostvarenjem osnovnih statutarnih ciljeva Saveza), samo preko posebno osnovanog pravnog lica.

Dobit koju Savez ostvari iz neposredne privredne djelatnosti može se upotrijebiti samo za ostvarivanje ciljeva koji se utvrde Statutom.

Član 38.

Sredstva Saveza mogu se u skladu sa zakonom trošiti za ostvarivanje funkcija i poslova utvrđenih ovim Statutom, a prema finansijskom planu.

Naredbodavac za izvršenje materijalno-finansijskih obaveza je Predsjednik i podpredsjednik Saveza.

XI POSTUPAK ZA DONOŠENJE STATUTA, IZMJENA I DOPUNA STATUTA I DRUGIH OPĆIH AKATA SAVEZA

Član 39.

Statut i Izmjene i dopune Statuta vrše se na prijedlog Upravnog odbora ili na pismenu inicijativu najmanje 4/5 članova Skupštine Saveza uključujući 4/5 (četiri petine) konstitutivnih naroda.

Prijedlog Statuta i Prijedlog izmjena i dopuna Statuta se utvrđuje najmanje 30 dana prije održavanja Skupštine. Prijedloge priprema Upravni odbor Saveza i podnosi ih Skupštini na usvajanje.

Statut i Izmjene i dopune Statuta usvaja Skupština odlukom sa 4/5 od ukupnog broja članova uključujući 4/5 (četiri petine) konstitutivnih naroda.

XII UVJETI I NAČIN UČLANJENJA, PRESTANAK ČLANSTVA KAO I PRAVA, DUŽNOSTI I ODGOVORNOST ČLANOVA SAVEZA

Član 40.

Članstvo u Karate savezu Federacije Bosne i Hercegovine mogu steći karate klubovi koji imaju svojstvo pravnog lica, odnosno koji su upisani u registar udruženja kod nadležnih organa za vođenje registra udruženja u skladu sa Zakonom o udruženjima i fondacijama Federacije Bosne i Hercegovine, te Zakona o sportu Bosne i Hercegovine.

Klubovi koji žele da se učlane u Karate savez Federacije Bosne i Hercegovine dostavljaju sekretaru saveza pisani zahtjev za prijem u članstvo sa potrebnom dokumentacijom, uključujući i statut i rješenje o upisu u registar kod nadležnih organa. Upravni odbor donosi odluku o zahtjevu kluba za članstvo.

Odluku o priznavanju statusa člana, pod uslovima iz prethodnog stava, donosi Upravni odbor Karate saveza Federacije Bosne i Hercegovine.

Klub mora biti član Karate saveza Federacije Bosne i Hercegovine, da bi mogao biti

registrovan u Karate savez Bosne i Hercegovine.

Članovi Karate saveza Federacije Bosne i Hercegovine su istovremeno i članovi Karate saveza Bosne i Hercegovine

Član 41.

Članstvo u Savezu može prestati dobrovoljno, zbog nemogućnosti kluba daljim bavljenjem karate sportom ili nemogućnosti ispunjavanja ciljeva iz Statuta Saveza.

Član se može isključiti iz Saveza ako se dokaže da djeluje suprotno ciljevima, odnosno Statutu.

Članstvo u Savezu može prestati i na osnovu odluke Upravnog odbora o privremenoj ili trajnoj suspenziji, zbog kršenja odredaba statuta i drugih akata i pravilnika Saveza i Statuta Karate saveza Federacije Bosne i Hercegovine.

Član 42.

Član Saveza kojem je izrečena mjera isključenja ima pravo žalbe u roku od 15. dana od dana prijema odluke Upravnog odbora..

Žalba se podnosi Skupštini. Odluka Skupštine po žalbi je konačna.

Član 43.

Klubovi udruženi u Karate savez Federacije Bosne i Hercegovine ne mijenjajući odnos sa Karate savezom Federacije Bosne i Hercegovine, mogu nastaviti kontinuitet djelovanja i rada u karate savezima nižih nivoa organizovanja

Tako formirani savezi ne mogu imati nikakav uticaj na pravo da Savez direktno saraduje sa klubovima i obrnuto.

Pravo priznavanja, suspenzije ili povlačenja priznanja tako formiranih saveza kao jedinstvenog sistema organizovanja Karate saveza Federacije Bosne i Hercegovine, ima Upravni odbor Saveza. O priznanju se odlučuje nakon razmatranja Statuta i njegove usklađenosti sa Statutom Karate saveza Federacije Bosne i Hercegovine.

Osnovani karate savezi nižih nivoa dužni su na najbolji mogući način saradivati i poštivati odluke Karate saveza Federacije Bosne i Hercegovine. Tako osnovani savezi dužni su jednom godišnje Savezu dostaviti izvještaj o radu (takmičarskim, organizacionim i ostalim aktivnostima).

Pravilnici osnovanih saveza moraju biti u skladu sa Statutom i Pravilnicima Karate saveza Federacije Bosne i Hercegovine i odlukama Upravnog odbora Saveza.

Ukoliko klub, članovi klubova ili pojedinci udruženi u Karate savez Federacije Bosne i Hercegovine prekrše odredbe Statuta Karate saveza Federacije Bosne i Hercegovine, Upravni odbor Saveza može da ograniči ili suspenduje aktivnosti tog kluba, ili pojedinca.

Član 44.

Članovi Saveza imaju jednaka prava da:

1. Preko svojih zastupnika aktivno učestvuju u radu i odlučivanju u svim organima i

tijelima Saveza,

2. Njihovi predstavnici biraju i budu birani u organe i tijela Saveza,
3. Aktivno učestvuju u utvrđivanju programa i plana rada Saveza i učestvuju u njihovoj realizaciji,
4. Ostvaruju zaštitu svojih prava.

XIII JAVNOST RADA

Član 45.

Upravni odbor se stara o redovnom informisanju članstva i javnosti o radu i aktivnostima Saveza, neposredno – putem konferencija za štampu ili putem štampanih publikacija - biltena preko oglasne table i web stranice Saveza, kroz saopštenja za javnost putem štampe i elektronskih medija ili na drugi sličan način.

Rad Saveza je javan i u pravilu Sjednicama Skupštine i Upravnog odbora Saveza mogu prisustvovati predstavnici sredstava informisanja.

Posebno kada to zahtijeva interes Saveza, odlukom organa, može se sjednica ili dio sjednice, proglasiti zatvorenom za javnost.

Javno može istupati u ime Saveza, Predsjednik, Podpredsjednik Upravnog odbora i Sekretar Saveza iz domena svojih nadležnosti.

U cilju ostvarivanja javnosti rada i informisanja Savez može osnovati javni štampani list ili elektronski medij u skladu sa Zakonom.

XIV UVJETI I POSTUPAK ZA PRIPAJANJE, RAZDVAJANJE, TRANSFORMACIJU ILI PRESTANAK RADA SAVEZA

Član 46.

Savez se može udružiti u šire organizirane sportske oblike: Karate savez Bosne i Hercegovine, kao i druga domaća udruženja i asocijacije koje se bave sportom. Odluke o učlanjenju ili udruživanju iz prethodnog stava donosi Skupština Saveza na prijedlog Upravnog odbora Saveza sa većinom od 4/5 (četiri petine) glasova od ukupnog broja članova Skupštine uključujući 4/5 (četiri petine) konstitutivnih naroda.

Član 47.

Savez može prestati sa radom dobrovoljno ili po sili Zakona.

Savez prestaje sa radom na način i pod uslovima predviđenim Zakonom.

Savez prestaje sa radom odlukom Skupštine Saveza zbog nemogućnosti daljeg ostvarivanja statutarnih ciljeva, ili zbog pripajanja, spajanja ili transformacije Saveza. Savez će prestati sa radom, ukoliko se Skupština Saveza izjasni da nema interesa za dalji rad Saveza.

Član 48.

Savez može prestati sa radom i donošenjem rješenja Ministarstva pravde Federacije Bosne i Hercegovine o prestanku rada Saveza ako je proteklo dvostruko više vremena od vremena utvrđenog Statutom Saveza za održavanje Skupštine Saveza, a Skupština Saveza nije održana.

Imovina Saveza se Odlukom Skupštine prenosi na drugo udruženje - savez koji obavlja istu ili sličnu statutarnu djelatnost.



Član 49.

Savez može prestati sa radom i donošenjem presude suda o zabrani rada Saveza u slučajevima predviđenim Zakonom o udruženjima i fondacijama Bosne i Hercegovine, a raspoređivanje preostale imovine Saveza vrši se samom presudom koju donosi Sud Federacije Bosne i Hercegovine. Postupak o zabrani rada Saveza pred Sudom Federacije zbog djelovanja suprotno odredbama Zakona o udruženjima i fondacijama pokreće Ministarstvo pravde Federacije Bosne i Hercegovine.

XV PRAVILA ZA RASPODJELU PREOSTALE IMOVINE U SLUČAJU PRESTANKA RADA UDRUŽENJA

Član 50.

U slučaju prestanka rada Saveza sva njegova imovina biće podijeljena među članicama. Podjelu imovine, likvidaciju udruženja "Karate savez Federacije Bosne i Hercegovine" izvršit će likvidacioni upravnik, kojeg imenuje Upravni odbor.

XVI PRIJELAZNE I ZAVRŠNE ODREDBE

Član 51.

Pored Statuta druga normativna akta Saveza su: Poslovnici o radu organa i komisija Saveza i Pravilnici po segmentima rada Saveza.

Poslovníkom se naročito određuje vlastita organizacija, pripremanje i sazivanje sjednica, način rada na sjednicama, način glasanja i odlučivanja, način donošenja i izvršavanja odluka, način obrazovanja i rada radnih tijela

Sve pravilnike priprema i predlaže Upravni odbor Saveza, a usvaja ih i donosi Skupština Saveza. Sve poslovničke o radu organa i tijela priprema i donosi Upravni odbor Saveza, izuzev Poslovnika o radu Skupštine Saveza kojeg usvaja i donosi Skupština Saveza.

Sva normativna akta Saveza stupaju na snagu osmog dana od dana usvajanja.

Izuzetno ako za to postoje naročito opravdani razlozi normativna akta Saveza stupaju na snagu narednog dana od dana usvajanja.

Kontrolu i nadzor rada Saveza vrši nadležno Ministarstvo.

Član 52.

Sva normativna akta Saveza donijet će se i uskladiti sa ovim Statutom u roku od 3 (tri) mjeseca od dana usvajanja izmjena i dopuna.

Ovaj Statut mora biti usklađen sa odredbama Statuta Karate saveza Bosne i Hercegovine.

Upravni odbor Saveza je nadležan za tumačenje odredaba i izradu prečišćenog teksta ovog Statuta.

Imenovanje i izbor u organe, odbore, komisije i druga tijela Karate saveza Federacije Bosne i Hercegovine kao i delegate, organe i tijela u Karate savez Bosne i Hercegovine biti će u odnosu 2:1 (dva prema jedan) zastupljenosti konstitutivnih naroda.

Svaki konstitutivni narod će predlagati svoje predstavnike u organe i tijela karate saveza Federacije Bosne i Hercegovine i Karate saveza Bosne i Hercegovine.

Sporazum iz Olimpijskog komiteta BiH (broj:009-02/16 od 13.01.2016. godine) je sastavni dio ovog Statuta.

Statut će biti napisan na svim službenim jezicima i pismima u Bosni i Hercegovini.

Član 53.

Statut Karate saveza Federacije Bosne i Hercegovine stupa na snagu u roku od osam dana od dana usvajanja.

Tuzla, 02.12.2017. godine



PREDSJEDNIK

Sipović Mirsad